

## → PENDIDIKAN

# Golongan belia perlu bijak urus kewangan peribadi

→ Strategi bersesuaian dapat bantu capai matlamat masa depan

Oleh Basir Zahrom  
basir\_zahrom@bh.com.my

↳ Serdang

**P**erancangan kewangan yang bijak dalam kalangan belia akan dapat mengawal selia perbelanjaan seseorang seterusnya mengelak mereka daripada dibelenggu masalah kewangan.

Raja Muda Selangor, Tengku Amir Shah Sultan Sharafuddin Idris Shah bertitah, memiliki strategi dan pengurusan kewangan

yang cekap penting terutama bagi mengelak masalah bankrap.

Baginda bertitah, seseorang itu perlu mempunyai ilmu pengetahuan dan pemahaman yang baik untuk mencapai tahap kewangan sihat.

“Pengurusan kewangan memang sangat penting terutama dalam kalangan belia yang terdedah dengan pelbagai medium perbelanjaan.

“Dalam hal kewangan juga ada strateginya, kita perlu bayangkan apa yang ingin dicapai dan berusaha untuk menjayakannya,” titahnya.

Baginda bertitah demikian dalam sesi perkongsian Program Be\$mart anjuran Yayasan CIMB dengan kerjasama Universiti Putra Malaysia (UPM), di sini, semalam.

### Terima maklum balas positif

Yang turut hadir ialah Ketua Pegawai Eksekutif Kumpulan CIMB, Datuk Seri Tengku Zafrul Aziz; Ketua Pegawai Eksekutif Yayasan CIMB, Datuk Hamidah Naziadin dan Naib Canselor UPM, Prof Datin Paduka Dr Aini Ideris.

Program yang dilancarkan Disember tahun lalu itu dijadual



Tengku Amir Shah, Tengku Zafrul Aziz (kanan), Hamidah (kiri), Prof Datin Paduka Dr Aini (lima dari kiri) bersama pemenang kumpulan yang menjana pendapatan paling tinggi dan memilih perancangan kewangan terbaik pada Program Be\$mart anjuran Yayasan CIMB dengan kerjasama UPM di Serdang, semalam.

### Info

### Program Be\$mart

- Program Be\$mart dedah tip elak bankrap
- Sasar penyertaan 4,000 belia
- 2017 sasar 80 sesi

dijalankan selama dua tahun di seluruh negara dengan menyasarkan penyertaan 4,000 belia dalam kalangan mahasiswa.

Sementara itu, Hamidah berkata, program dua hari itu sudah dijalankan 34 sesi sebelum ini dan menerima maklum balas positif daripada peserta.

“Tahun ini kami menyasarkan untuk mengadakan 80 sesi untuk mendedahkan pelajar terhadap kepentingan pengurusan kewangan serta topik berkaitan termasuk pelaburan dan hartanah,” katanya.

[ FOTO NURUL SHAFINA JEMENON/BH ]